

**Петро Матад Лимитед ("Петро Матад" эсвэл "Компани" гэх)
Үйл ажиллагааны шинэчилсэн мэдээлэл – ДТ-9 цооногийн үр дүн**

Петро Матад нь Давсан Толгой-9 цооногийг ("ДТ-9" гэх) 1,766 метрийн гүнд, Доод Цагаанцавын формацийн доод талын хувирмал чулуулаг хүртэл өрөмдөж дуусгасныг мэдэгдэж байна.

Өрөмдлөгийн явцад 1,596 метрийн гүнээс эхлэн Доод Цагаанцавын Формацийн дээд хэсэгт нэвтэрсэн бөгөөд энэ хэсэгт хөхөвтөр цагаан өнгийн флюоресценц үйрмэгтэй амьд тосны илэрц бүхий элсэн чулууны бүс тогтоогдлоо. Дээрхи илэрц тогтоогдохоос өмнө хийн муруйн үзүүлэлт Доод Зүүнбаянгийн тусгаарлагч давхаргад нэмэгдсэн. Доод Цагаанцавын Формацид нийт 132 метр өрөмдөж, 1,639-1,651 метрийн хооронд дунджаар 23 хувийн нүх сүвшилтэй, 8 метрийн цэвэр зузаантай тост үе байгааг тогтоосон.

ДТ-9 цооногийг Петро Матад компанийн хэтийн төлөв сайтай "Шороо" талбайд ялгасан Доод Цагаанцавын бүтцийн хураагуурыг судлах зорилгоор өрөмдсөн. Компани дараагийн цооногоо хэтийн төлөв сайтай "Шороо" талбайн үргэлжлэл хэсэгт өрөмдөхөөр бэлтгэж байна. Энэ хэсгийн Доод Цагаанцавын агуулагч давхаргын түвшин нь ДТ-9 цооногийнхоос 100 метрийн өндөрт ялгагдсан. Тус хэтийн төлөв сайтай талбайн байршлын зургийг Компанийн цахим хуудсанд тавигдсан 2011 оны 07 дугаар сарын 14-ний Үйл ажиллагааны мэдээллээс харна уу. ДТ-9 цооногийн өрөмдлөгөөр нүх сүвшил сайтай, нүүрсустөрөгчийн ханалт өндөртэй элсэн чулуу илэрсэн нь одоо хийгдэж байгаа цооногийн туршилтын хөтөлбөрийн хүрээнд судлах бүсүүдийг нарийвчлан тодорхойлж өгч байна.

Хайгуулын өрмийн цамхагийг ДТ-9 цооногоос ДТ-10 цооногийн байрлал руу нүүлгэсэн. ДТ-10 цооногийн өрөмдлөгөөр ДТ-9 цооногоос урагшаа 4.3 км-т, ДТ-9 цооногийн түвшингээс дээш 450 метрийн өндөрт байрлах салангид бүтцийн хураагуур доторхи Доод Цагаанцавын Формацийг судална. Энэхүү бүтэц нь Компанийн хэтийн төлөв сайтай "Шороо" болон "Гал" талбайдын хооронд, саяхан хийгдсэн Давсан Толгойн 3 хэмжээст сейсмийн судалгааны дахин боловсруулалтаар зураглалыг нь сайжруулсан талбайд оршино. ДТ-10 цооногийн өрөмдлөгөөр судлах бүтэц нь Давсан Толгойн хойд талын XIX талбайн Тосон Уулын ордын олборлолт хийгдэж буй бүтцүүдтэй ижил төстэй юм. Мөн түүнчлэн ДТ-10 цооногийн гүдэн бүтэц нь ДТ-9 цооног болон 2010 оны өрөмдлөгөөр Доод Цагаанцавын Формациас тос илрүүлсэн ДТ-3 цооногийн хооронд тайлалаар тодорхойлогдсон шилжилтийн замын дагуу байрлана. ДТ-10 цооногийн өрөмдлөгөөр Матад ХХ талбайн Давсан Толгойн баруун хэсэг дэх Доод Цагаанцавын хэтийн төлөв сайтай талбайг үргэлжлүүлэн судлах юм. ДТ-10 цооногийн өрөмдлөгийг 2011 оны 08 дугаар сарын 21-ний 13:00 цагт (Монгол Улсны орон нутгийн цагаар) эхлүүлсэн.

Петро Матад Компанийн Ерөнхий Гүйцэтгэх Захирал Даглас МакГэй өрөмдлөгийн үр дүнг дүгнэж хэлэхдээ "Бидний сүүлийн өрөмдсөн ДТ-9 цооног амжилттай үр дүн үзүүлж, сайн чанарын нүүрсустөрөгч илэрсэнд баяртай байна. ДТ-9 болон өмнө нь өрөмдсөн ДТ-4 цооногуудын амжилттай үр дүн, 3 хэмжээст сейсмийн судалгааны дахин зураглал, дахин боловсруулалтын тусламжтайгаар Давсан Толгойн хэтийн төлөв сайтай "Шороо" талбайн судалгааны ажил маш ахицтай явагдаж байна." гэлээ.

"Бид Давсан Толгой, түүний ойр орчмын талбайдаас шинээр үүсгэсэн болон дахин боловсруулсан мэдээллээс бүрдсэн томоохон хэмжээний мэдээллийн

санг бүрдүүлж байна. Бид сейсмийн зураглал, нэгтгэсэн мэдээллийг (2 ба 3 хэмжээст судалгаа, 2011 онд гүйцэтгэсэн 2 хэмжээст судалгааны дахин боловсруулсан мэдээлэл) энэ жил гүйцэтгэсэн өрөмдлөг, цооногийн туршилтын ажлын үр дүнгүүдтэй хослуулан Компанийн талбайдын талаархи ойлголт, мэдлэгээ улам баяжуулан бататгах болно.” гэлээ.

Энэхүү мэдээлэлд агуулагдсан техникийн мэдээллийг Компанийн Хайгуулын Менежер Доктор Жеймс Күүган хянасан болно. Доктор Күүган нь Хойд Америк, олон улсын хайгуул болон ашиглалтын чиглэлээр 30 жил ажилласан туршлагатай газрын тосны геологич юм. Тэрээр Америкийн Газрын Тосны Геологичдын Холбоо болон Америкийн Геологийн Нийгэмлэгийн гишүүн юм.

Петро Матад Лимитедийн тухай

Петро Матад нь Монгол Улсад газрын тосны хайгуул хийх, цаашид ашиглалт, үйлдвэрлэл явуулах зорилго бүхий группын толгой компани юм. Тус групп нь Монгол Улсын Засгийн газартай Бүтээгдэхүүн Хуваах гурван гэрээг дангаар байгуулан ажиллаж байна. Группын үндсэн хөрөнгө нь Монгол орны зүүн хэсэгт орших 10,340 км² талбай бүхий газрын тосны Матад ХХ талбайн Бүтээгдэхүүн Хуваах Гэрээ (“БХГ” гэх) юм. Үлдсэн хоёр талбай болох IV ба V талбайд нь Монгол орны төв хэсэгт оршдог бөгөөд хоёр талбай нийтдээ 71,040 км² талбайг хамарна.

Петро Матад Лимитед нь 1483V компанийн бүртгэлийн дугаартайгаар Мэний Аралд (Isle of Man) аралд үүсэн байгуулагдсан. Албан ёсны бүртгэлтэй төв байр нь Виктори Хаус, Проспет Хилл, Даглас, Айл эф Мэн, Ай Эм 1, 1ИКью (Victory House, Prospect Hill, Douglas, Isle of Man, IM1 1EQ)-д байрладаг.

Нэмэлт мэдээллийг:

Петро Матад Лимитед
Ерөнхий Гүйцэтгэх Захирал – Даглас Ж. МакГей (Douglas J. McGay)
+976 11 331099

Уэстхауз Секьюритиз Лимитед
Ричард Бэти/Питр Нортон (Richard Baty/Petre Norton)
+44 (0)20 7601 6100